

Vladislavus IV


Poloniae Rex

Cynerici Joannis Prussia recuperata

PANDE. et VITAE

Polon. 4^o

M 1072.



P R V S S I A

Sereniss^{mi} ac Potentiss^{mi}

VLADISLAI IV.

P O L O N I A R V M,

Sueccorum, Gotthorum, Vandalorum,

R E G I S inuictiss.

M A G N I D V C I S L I T H V A N I Æ

&c. &c.

Felicitate, Prudentia, Æquitate,

R E C V P E R A T A,

E T

In florentiss: Academiæ Cracouiens. Lycæo,

⁂

M. IOANNE CYNERSKI Rachtamouio,
Coll. Min. Ordin. Eloquen. Profess.

D V M

Primâ in bonis artibus, & Philosophia laureâ, Candidatos or-
naret, publica dissertatione, Die 12. Octob.

C E L E B R A T A.

CRACOVIÆ In Officina Francisci Cæsarij.

(1635)



16983 I

Præcipites Euros, tempestatesq₃ sonoras
 Cymba potens supera, regnaq₃ amena pete;
 Ecce fauet Pallas, fauet almo lumine Phæbus,
 Vt serues solidas posteritatis opes.
 Nobile Musarum vehis ingenium, atq₃ Parentum
 Delitium, Patriæ præsidiumq₃ tuæ.


Petrus Białobrzeński,
 Stud. Eloquen



NOBILI, AC GENEROSO VIRO,
D. SIMONI STAROVOLSCIO,

Libertatis Polonæ, bonæq; Famæ, apud exterar
Nationes, doctissimis scriptis Vindici,
& assertori longè clariss.

M. IOANNES CYNERSKI Rachtamouius, Coll. Minor,
Ord. Eloquentiæ Professor S. & F.

 Dissertationem Tibi meam, de recuperata
Prussia, quam in frequentissimo Lycæi Aca-
demici confluxu, Tu quoq; præsens audiuidi,
Vir Nobiliss. mitto: ut vel hoc leuidensi mu-
nere, pro singularibus Tuis in me, veteribusq;
beneficiis, in absentem etiam, grata mentis
significationem & obseruantiam tester. Non poterat hæc præ-
senti Tibi, ob celerem in exterar nationes discessum, Magnæ
spei Iuuenis, ALEXANDRIà Koniecpole KONIECPOLSKI,
Illustriss: Castell; Cracouiën. & Exercituum Regni Supremi
DVICIS Filij, in prælo dari: sed tamen eadem nullo fucò tincta,
nullis verborum calamistris ornata, nullis dicendi phaleris ac
lenociniis illustrata, Tibi se se offert; ut eundem in illa candor-
em, eandem illam extemporaneam, quam præsens excepisti,
agnoscas simplicitatem. Ergo Te Deus Opr: Max: cum tanto
Illustriss: Familiæ pignore, quod Tuæ fidei concreditum est,
saluum & incolumem, per omnes vias, & itinera ducat. In-
terea nos, qui votis, illum lectissimum, suauissimumq; Iuuenem,
hinc abeuntem, pijs etiam perfusi lachrymis, prosecuti sumus;

pro absente, eidem Deo vigilantissimo Heroum Custodi, feruentissimas preces nostras offeremus, ut quàm prosperrima sanitate, in illis quas nunquam aspexit regionibus utatur: utq; quàm felicissimis omnium bonarum artiũ instructus præsidiis, in Patriam redeat. In eo enim Illustriss: Parentes & Amici, Cognatique, singularem & eximiam spem generis ac solatij collocarunt. Congerat illinc rara fortitudinis exempla, quæ hic pressa per maiorum suæ Gentis, fortissimiq; Parentis vestigia, nobis in luce Patriæ, inq; rigido Martis campo probet & exhibeat: consilia prudentiss. Virorũ notet, contempletur nationũ genium, mores ingenuos inspiciat gentium, varietatem obseruet ingeniorum, ceterasq; futuro Patriæ Ciue dignissimas virtutes, animo solerti, auida q; mente, ut hic apud nos solebat, concipiat, hauriat q;. Quanquam enim domi, magna & illustria, præsentia veteraq; præsto habuerit exempla, quæ docili effingeret imitatione: tamen peregrina quoq;, nescio quo pacto, non generosa modo indolis adolescentes, sed sapientes etiam viros commouent, & vel inuitos in sui rapiunt admirationem. Itaq; no magnis sæpe Ciuibus pudori fuit, si qui non exteras peragrassent regiones: siq; nihil in illis præclarum, nihil illustre, nihil magnificum, vel magnanimum vidissent notassent q;: quod vel ad studium bellicæ rei, vel ad splendorem imperiorum, vel culturam ingeniorum, vel certè optimorum dignitatem morũ pertinere videretur. Bonis igitur auib; & omine fausto, Nobilis ac Generose Vir, qui toties Germaniam, Italiam, Hispanias, Gallias, ceterasq; nationes exteras, studioso peragrasti aditu, artium nomenq; Polonũ celeberrimis ubiq; scriptis, in omni genere sciẽtiarum illustrasti, deduc ad Vrbes nobilissimas, propugnaculam
fortis

fortissima, palatia splendidissima, gentes bellicosissimas, regiones populosq; linguis, ingeniis, pietate, sapientia, rerum bellicarū studio, toto orbe celeberrimas, MAGNI CIVIS PATRIÆ, Magnæ spei Filium: ut hinc opibus firmam, illustrem pietate, fortitudine conspicuam, omni genere bonorum abundantem, similibus virtutibus ille Domum suam ornet, ac tueatur. Nos verò ingenti cum desiderio, & alacritate animorum præstolabimur, ut nobis hunc præstantissimū pulcherrimumq; Polonæ Nobilitatis fosculum, dulcissimas Magnanimorum Parentum delitias, futurum afflictæ Reipub. solatium, Academiæ verò nostræ decus ac firmamentum, quantocius & quam felicissimè reddas, ac restituas. Interea te oro, & obsecro, Vir doctiss. ut si quod scriptum prurientis ingenij scriptores, in Poloni nominis contemptum, ut sæpè solent, illis in oris in vulgus sparserint, mihi quoq; mittas. Nam casu quodam apud amicum meum vidi, & legi, quæ superioribus annis scripserit, gravissimus ille, & veritatis (si Dñs placet) amatissimus author, cuius nomen ex contagione Gallica, & argilla Belgica, conflatum est: dignus profecto qui cum suo mendacissimo, & impudentissimo fœtu, nunquam lucem aspiciat; quiq; non in spongiam, velut Ajax Augusti, sed in pugionem, velut parricida Nero, incumbat. Quas fugas nugasq; Polonis, quas adoreas Moschis, quem blandientis Fortunæ risum Sehinio, quas rapinas, quæ latrocinia? quam fæditatem fortissimis nostris militibus, contra sentas, sum, famamq; Orbis uniuersi, egregius videlicet ille veritatis tu, arbiter affingat? quis sanæ mentis homo non agnoscat, si inter ipsius turpissima deliramenta, quæ euomit in nos sceleratissimulamus nebulo, Anno Dñi 1633. fol: 15. Itemq; Anno 1634. lib. 4.

fol. 113. Tomo XIX. inspexerit? Sed ego istum morionem, istum
versutum impostorem, istum veterem veteratorem, fœdissimis
mendaciis ructantem; & in conspectu eruditissimorum virorū
nauseantem, conieci iam in refutatorias plagas. Frustra iacta-
bit se aliquando sub istis cassibus Mars nouus, rigidusq; Veneris
satelles, ridentibus omnibus Dijs, Deabusq;. Quid? illi ego
clementior benigniorq; fuero? illi non respondebo? qui testem sui
stuporis orbem fecit vniuersum: dum integerrimam, Patriæ no-
stræ Famam, victoriasq; omni gentium memoria dignissimas,
mordacissimo lacerare stylo non erubuit? Licuit illi pro libidi-
ne sua fingere deliramenta, ad contemptum nostrum, mihi vera
loqui, pro Patriæ meæ defensione non licebit? At ista menda-
cia non sunt habitura fidem, apud grauissimos orbis Principes,
ac ideo solidam gentis nostræ gloriam ledere non possunt? At
verò minimus etiam magnanimo leoni molestus esse solet in
aure culex: & importunus quanquam ab inglorio sparsus ho-
muncione rumor, non potest etiam fortissimis non displicere
Ciuiibus, qui Patriæ illibatam armis & ingenio protegunt in-
nocentiam. Itaq; sunt, eruntq; multi nostræ Reipub. eloquentis-
simi viri, qui feliciori fortioriꝝ calamo, hunc mendacissimū
tenebrionem pungent; sed nec ego minorum Quiritium Ciuis,
quo minus casses illi nectam, debeo mihi temperare. Vidisti
enim hos apud me, Vir nobilissime, foreq; rem spectaculo non in-
iucundam, si se ipsa complicatis laqueis insolentissima fera iu-
gularret, iudicasti. Et iam pridem illos eduxissem in lucem: sed
unde tamen sufficiens laboriosis operarijs, qui fœdissimam hanc
belluam stylis conficerent sumptus? unde inquam Typogra-
phis, qui literis rem notarent gestam, iustum præmium? Ex illis
videli-

videlicet decem vernaculis minis, quæ antiquissimo more maiorum, dum aurea essent sæcula, annuo professionis stipendio cōsecrata sunt? quibus liber, vestis, cæteraq; ad vitam necessaria comparanda. Ideo multi dum barbaras feras inuadere parant, dumq; gloriæ obsonium querunt, vestes (quod est in prouerbio) perdunt, & laceri ipsi attritiq; ex simili certamine, raroq; victores abeunt; in cursu denique ipso multi sæpè inglorij cadunt: vel ut Maro noster ait:

— Indecores in limine primo
Deficiunt.

Et illud quoq; in emittendis in lucem nostris lucubrationibus grauiissimum est incommodum, quòd Bibliographi nostri, quamquam sint prælo & diligentia celebres, præmio certè atq; fructu inferiores habeantur. Quicquid apud nos nascitur, etiam subito, summo cum dolore doctissimorum virorum apud nos occidit. Sumus enim barbaris undiq; gentibus cincti, & circumsepti, quibus cum nullum nobis esse potest literarum commercium. Nam Moschi, Scythæ, Gotthi, Vandali, Rutheni albi, quantam occupent terrarum magnitudinem, quantamq; foueant ruditatem, quis ignorat? At in illis regionibus magnam habent inter se familiaritatem, magnaq; commercia Typographi, dum adeo sunt industrij attentiq; ad rem suam, ut quicquid expresserint, illico summo cum fructu, in orbem diffundant vniuersum. Itaq; tu STAROVOLSCI, prudentissimo atq; optimo consilio, tuas accuratas, ac meditatas in omni genere scientiarum commentationes, erectus feliciori fama, sparsisti & diuulgasti, in omnes angulos Christianorum populorū, atq; regnorum, quæcunq; Romanam linguā propitio favore celebrāt.

Sed

Sed forsan excessi modum Epistola, quam primo beneuolentia, fauorq; propensissimus, in Iuuenem nobilissimum, deinde publica nostrae Gentis iniuria, dolorq; iustus fecerunt longiorem. GERARDVM illum Ciuem nostrum grauissimum, quem ut hospitio meo susceperem, antequam in lucem emigrarit Suauiss: STAROVOLSCI, author mihi, suasorq; fuisti, atq; adeo illustris gratiae conciliandae monstrasti viam, quotidie succisuiis horis, (etenim magno insperatoq; saepe curarum, incidentiumq; laborum abripior aestu) inuiso, & saluto; doq; operam diligentissimam, ut neque me officiosa humanitatis olim, neq; Illustriss: Maecenatem; locati clarissimi Hospitis apud me, poeniteat. Ingeniosiss: atque optimi STANISLAVS & ZIGISMUNDVS DONHOFFII, Illustriss: Palat: Siradien. Castell. Pernauien. (ut benè nosti) Filij, qui egregijs incrementis, ad haereditariam bonae gloriae possessionem properant, adq; Reipublicae decus eximium adolescunt (iam enim Generosus D. STANISLAVS, illustri Praefectura Vielunen. honore conspicuus, summa cum laude, & vicinorum admiratione, hac tenera in aetate, iudicijs frequentissimè celebratis, & Spartam illam suam adornat, & Phæbo nostro Musisq; Academicis obnixè fauet) Fratrem suum dulcissimum, & Nobilem ac Generosum D. Christophorum Thomicium, totamq; Familiam, officiosissimè salutant. Iterum, iterumq; vale Vir doctissime meq; ut facis, ama. Dat. Crac. è Collegio Min. D. 19. Octob. Anno D. 1635.

IOANNIS

IOANNIS RAPHAELIS
Comitis à Tarnow, Stud. Eloquen.
PHALEVCVS,
IN

*Mercurium (si Dijs placet) Gallobelgicum rerum ge-
starum, huius seculi scriptorem mendaciss.*

M. Tullius lib. 2. de Orat.

Q*Vis nescit primam esse Historia legem, ne quid falsi
dicere audeat, deinde ne quid veri non audeat:
ne qua suspicio gratie sit in scribendo, ne qua simularis.*

Mendacissime Mercuri Nepotum,
Furacissime Mercuri Nepotum,
Quot sunt, quotque fuere Gallicorum,
Quot sunt, quotque fuere Belgicorum;
Quotque post alijs erunt in annis,
Si qui post alijs erunt in annis,
Si qui retro alijs erant in annis.

Nam non possibile est scelestiorem,
Qui furuus, furiat scelestiori
Ore, dente, maleuolentiâque;

Nam non possibile est ferociorem
Qui ferociat efferaciori
Cruditate, in opes beatiorum
Gentium magis; ac magis proteruum,
Qui proteruiat impudentiore
Diritate, stylo, proteruitate, in
Æquitatis amabiles Quirites;
Nec qui proruat inquinatiori,
Cæno diuitias amæniores,
Gentis Sarmaticæ, potentis omni
Famâ, posteritatem in æuiternam,
Futurum dare posse sæculum vt tu es!
Elapsûmque dedisse sæculum vt tu es!

Per mendacia, per doloſque linguæ,
Defædare genus POLONIARVM,
Iuſtum, magnanimum, fidele, forte,
Auſus es ſcelerate parricida?

Auſus es calamo insolentiori,
Auſus es calamo efferaciori,
Auſus es calamo impotentiori,
Euitare bonam ô ferox ſatelles,
Euirare piam, impie ô lanista,
Viſcerare ſacram ô Tyranne GENTEM?
Ingentem meritis in Orbe gentem!

Stupen-

Stupendam pietate in Orbe Gentem!

Potentemque viris in Orbe Gentem!

Quam BELLONA Parens tuetur armis,

Quam MARS purpureus tuetur armis,

Quam MINERVA sagax tuetur armis;

Armis eloquij suauioris,

Armis consilij potentioris,

Armis ingenuæ eruditionis.

GALLOBELGICE trux, vafer, cruento,

Excors ardelio, quid inde lucri

Effrons Morio, quid capeffis inde

Spei? perfidus vt nisi sis omni

Seclo proditor, elegantioris

Gloriæ, Fidei, Innocentiæque;

Fortitudinis, Æquitatis hostis:

Hostis Historiæ sonantioris

Bono Nomine, prosperâque Famâ.

Nulla Sanguinis vtriusque Gentis

Inest vena tibi Alma sempiternum

Indixit tibi Veritas, ab omni

Catu nobilium recessum. Inertes


Aufer sarcinulas, miserrime exul


Exspes, perditæ, nec dolende cuiquam,

Proscriptæ Historiæ sereniori

Albo, iam tēnebris obrute vāstis,
Blattis, & tineis, manebis esca:
Ad Græcas tibi nam fidem Calendas
Arbitri solidæ elocutionis
Dabunt. Conscelerate veritatis
Mastix, vappa vaferrime Æquitatis,
Insanissime sannio innocentum,
Impurissime Natta Morionum,
Obscurissime talpa regionum,
Fallacissime prædo Principum Orbis.

Ignauissime Mercuri Nepotum
Perditissime Mercuri Nepotum,
Quot sunt quotque fuere Gallicorum,
Quot sunt quotque fuere Belgicorum.





PRUSSIA RECUPERATA.



Lertius hic est SERENISS: VLADISLAI IV. atque felicissimus auspicatissimi annus imperij, Perillustres, Magnifici, Adm. R. Clariss. Nobilissq. Audit. quo nobis post maximas immortalique memoria dignissimas victorias, miserabili seruitute mancipatam ab iniquis possessoribus, admirabili felicitate, prudentiâ, æquitate, recuperavit Prussia, in pristinamque velut postliminio reuocauit libertatem. Gaudemus omnes, incredibiliq; lætitiâ efferimur, plurimumq; vt debemus REGI nostro felicissimo, atq; optimo, prosperam hanc fortunam, & eximiam in rebus gerendis dexteritatem gratulamur: Deo verò Opt: Max: tantorum bonorum largitori, ac perfectori, gratias agimus, & habemus immortales. Illius enim beneficio amplissimo perfectum est, vt inflammati grauissimis odijs animi, à furore, cædibus, incendijs, perpetuâ laceratione, tandē aliquando, ad mutuum amorem, concordiam, tranquillitatem, pacemque reuocarentur. Grator nunc est nobis, post illa fulgura, atq; tonitrua, hæc tanta serenitas, quam Cælum ipsum, quod æstate in illo primo apparatu bellorum, tristissimis pluuijs obfuscauerat, gratissimo isto lumine videtur approbasse. Et quidem ego Aud. in principio huius belli, quod cum parum æquis vicinis susceperamus,

P R U S S I A

timui vehementer, ne conditio insidiosa pacis, auream neutelis
bis confunderet libertatem: verum posteaquam & ipso
maximarum momenta rerum inspexi, atque cognoui, non
quaquam ab his dissentire potui rationibus, quas prudentes
& graues circumferebant viri. Agam igitur vobis
applaudentibus, & congratulantibus Aud. de recuperatione
Prussia; & ita agam, vt nemo me aut ingratum, aut imple-
um, aut iniustum, in recognoscendis tantis bonis, quis,
recuperauimus cum Prussia, deprehendat. Nulli huius
profecto magis conuenit Induciarum latissimum nomen
celebrari, quam in hac æde Concordiæ, in templo Pacis
in Lycæo Musarum, in Areopago libertatis, in Prytanee v-
optimè meritorum sapientissimorumque virorum. Sicut
gratus alijs acceptusque hic rumor, cum recuperatam audiemus
unt esse Prussiam, nobis certè pius & sanctus esse debet,
qui casta religione Præsidentem sapientiæ, bellorumque
Palladem colimus; cui fortissimam Ægidem sapientissimam
antiquitas consecrauit; & Musis Caduceum addimus, vt
velut signum dulcissimæ Pacis sempiternum. Quod spe-
Belgicus ille scriptor, sæculi nostri vnio nobilissimus, I V A-
S T V S L I P S I V S in sua quadam dissertatione de Pace
non dubitauit gloriari, Magnitudinem sui REGIS, virtutem
ac fortunam Hispaniarum, intra sexaginta annos, formidum
dabilem factam esse finitimis & longinquis: nos qui intra
triennium tantas victorias videmus? tanta emolumentate
decerpimus? tantam gloriam ob S. R. M. fortitudinem
pietatem, prudentiam, fælicitatem, clementiam experti
sumus

RECUPERATA.

sumus, non meritò gloriabimur? non omnino tantas virtutes iucundissima commemoratione, atque laude celebrabimus? Et celebrabimus quidem meritò libenterq; diei, nonodierna tanta bona: Vosmodò Aud. qui grati, qui pij, quidequi fauentes, tantorum beneficiorum adestis arbitri, vobis & obsecro, ne rem ipsam, dictionemque meam ex tempore fusam (scitis enim quo die rumor hic ad nos pervenit) priusquam momenta singula rationum cognoveritis, respuatis, vel contemnatis.

Magnum n. hoc beneficium, virtute, fælicitate, prudentia, VLADISLAI IV. percepimus Aud. atque ita magnum, vt hoc tempore nullum maius, nullum illustrius, & magnificentius percepisse videamur. Oppugnabant nos barbari, vexabant Scy-

thæ, premebant Turcæ; pacem dedit, pacem restituit, pacem reuocavit, & perfecit cum his tantis, tamque immanibus gentibus VLADISLAVS REX: sed nisi hanc flammam, quæ in ipsis visceribus Patriæ concepta fuit, restinxisset, nisi Prussiam nobis optimo plenissimoque iure integram, inuiolatamque reddidisset; non poterat (ignoscite quod superiori verbo Aud.) non poterat inquã VLADISLAVS, I. V. Patriæ, vindex libertatis, communis author Pacis appellari. Adeò facilius est, vel cum Othomano, vel cum Mortuocho, vel cum Scytha conficere periculosum bellum, quam cum eo hoste, qui nostris ditionibus insidet, nostris contrariis adhæret, nostras premit vicinitate, fatigatque temeritate leges; nouit fœdera, nouit vires, nouit potentiam, inueniamque pugnandi, & consultandi rationem. Quas olim

lites

P R U S S I A

lites, quas contentiones, quos tumultus, in huius oratione
 cuperatione sensimus; quæ, & quam atrocia bella, cum
 Crucigeris gessimus, quis, qui vel leuiter monumenta super
 riorum sæculorū inspexerit, ignorare potest? Venit nobis in
 scijs GVSTAVVS, sanguine intimus, vicinitate proximus
 arte militari, & stratagematis instructissimus, quis huic resist
 tit? quis illius à Patria vim? & importunā auertit impetiti
 nē? quis virtute coercuit fraudem? quis audaciam, dolum
 malum, fortitudine repressit, & compescuit? Cū præ
 fertim tūm bello Turcico graui, & periculoso, esset tota na
 stra præoccupata Polonia. Magis attenti fuimus ô Poloni
 mei, ad prodigia ruentis in præcipitium Russiæ, quàm a
 reprimendos insultus deficientis, & in suo scelere exultan
 tis Prussiæ. Illam oppugnabat hostis barbarus, hanc op
 primebat hospes & amicus; illam Osmanus, hanc GV
 STAVVS rapiebat. Et quanquam rebus omnibus, cum
 immanissimo hoste gloriosè confectis triumphauimus, hi
 tamen (fatendum enim est, quod fuit in re) dolo male
 victi sumus, succubuimus. Nam alijs negotijs distenti, fo
 dera, conditionesque Pacis iniquas, ad tempus, ab impor
 tunissimo hospite, coacti sumus accipere.

Illuxit tandem nobis, prospera serenaque fatorum be
 nignitas, postquam REGNUM REX VLADISLAVS
 potens, fortis, fortunatus, in tutelam accepit suam. Su
 bitò enim, non solum illam labem, quæ diu, cum graui
 simo dedecore nomini Polono inhæserat absterfit, sed
 hanc quoque ignominiam, quæ ab omnibus gentibus
 summo

R E C V P E R A T A.

summo cum stupore spectabatur, deleuit, & extinxit. Vicit Moschum iustitia, Othomanum prudentiâ; sed ne quicquam ad memorabilem gloriam, atq; triumphum desideraretur, vicisse debuit, in intimis visceribus nostris, hostem latentem clementiâ. Eduxit igitur legiones, euocauit exercitus, instruxit acies in Prussia; sed vt non armis, quàm rationibus potius, & argumentis, clementissimus ac prudentissimus R E X pugnaret.

Quàm felices estis eloquentissimi Patriæ Ciues, vosque prudentissimi vicinarum gentium Oratores, qui R E G I nostro, pio, forti, felici, gentilitia arma ad tempus illud implicatū occultastis, qui militum vel iustum dolorem, vel iniuriam, vel fortitudinem, mirabili vestra prudentia cōpescuistis, temperastis; priusque sapientia leporeque vestro mellitissimo, efferatos animos vincere, quàm illi oppugnassent hostes, docuistis. Itaqué disertissimi atque prudentissimi Sarmatici Nestores, hodie eloquentiæ vestræ fructum percipitis longè vberrimum, dum ætate senes, auctoritate venerabiles; ferocientibus militibus, caloreque iuuenili, ad sanguinis effusionem efferuescentibus, omnem occasionem belli abstulistis: Martem insuper ipsum, minas spirantem, euomentem incendia, eiaculantem fulmina, vibrantem tonitrua, ab illis oris, aspectu vestro venerando, terruistis, auertistis, fugastis. Non siccâ, sed linguâ, non fuso sanguine, sed illa flexanimâ eloquentiâ, quæ regit temperatque animos mortalium, pugnaistis, vicistis: priusque de futuris vtriusque partis victoribus triumphastis, quàm se il-

li victos superatosq; cognouissent. *Magna res est* (ait Æneas Syluius in gnomolia sua, quam ego sententiam delibauit ab ore facundis. fenis; clarissimiq; Iurisprudentiæ sacerdotis, Thomæ Swinárski à piątek, dum pridie cum eo hisce de rebus agerem) *Magna igitur res est*, (ait ille) *facundia, nihilq; est, quod tam regat orbem hunc vniuersum, quam eloquentia: quoniam quicquid in Repub. agimus, verbis persuasi agimus; illiusq; vnius in populo regnat, vincit, triumphat sententia, qui melius & acutiùs persuadere nouit.* Nimirum hic quoque triumphus, per eloquentem Suadam paratus, ne solus in nostris regionibus Mars, de fufis prostratisq; triumpharet hostibus, desiderabatur: vt vtrumq; decus, vtraq; spolia opima, Toga Sagoq; potentis. VLA-DISLA VS possideret.

Stultum est Aud. more ferarum, viribus certare corporis, cum animi robore possis vincere. Stultum est summo cum apparatu, armare diu militem ad prælium, quod citò rationibus possis conficere. Stultum est, graue & periculosum, Pacis gratiâ bellum suscipere, ipsam verò pacem sese sponte offerentem repudiare: *Cum* (vt Hannibal ad Scipionem aiebat) *nunquam minus euentus rerum, respondeat, quàm in bello.* Arma valent, cùm ratio deficit, cùm ad coerendos sedandosq; tumultus, sanum nihil prodest consilium, pugnandum est. Hominum est verum prælium, non strepitu armorum, sed dignitate rationum configere.

Nec priuatos focos, nec publicas leges, nec libertatis iura, chara videtur habere; quem discordiæ gentium, quæ

cædes

R E C V P E R A T A.

E. cædes Ciuium, quem tumultus populorum, quem bella
i. propemodum Ciuilia delectant. Omnino hanc tantam
a. gloriæ cupiditatem, vna hæc modestioris Æquitatis medi-
o. cina debuit temperare: cum cæca regnandi libido, homi-
n. nes plerumq; rapiat, vt nullis finibus contenti sint, nullo-
r. que fædere pacis oblectentur.

Scytharum legatos sic locutos ad Alexandrum Regem
r. commemorat Historicus: *Si Dij habitum corporis tui, au-
i. ditati animi parem esse voluissent, Orbis te non caperet: alte-
m. ra manu Orientem, altera Occidentem contingeres: & hoc
o. affecutus scire velles, vbi tanti luminis fulgor conderetur!
p. Sic quoq; concupiscis quod non capitur. Ab Europa petis Asiã:
A. ex Asia transis in Europam. Deinde si humanum genus omne
o. superaueris, cum syluis & nubibus, & fulminibus, ferisq; ac
o. bestiis gesturus es bellum. Quid? Tu ignoras, arbores integras
i. diu crescere, vna tantum hora extirpari. Stultus est qui fru-
t. ctus earum spectat, altitudinem non metitur. Vide, ne dum ad
r. cacumen peruenire contendis, cum ipsis ramis, quos compre-
henderis decidas. Leo quoq; aliquando, minimarum auium pa-
bulum fuit. Ferrum rubigo consumit. Nihil tam firmum est,
i. cui periculum non sit, etiam ab inualido*

Quam tibi à nobis inferri prætendebas iniuriam Adol-
phe Gustaue? Vexasti Lithuaniam, præripuisti Liuania n,
sollicitasti contra nos ad arma Moschouiam, inuasisti ab-
sente Rege, absente Duce, absente exercitu, nobis absen-
tibus P R V S S I A M: cùm omnes acerrimo tum bello
nobis à Spartaco immanissimo illato, grauius inè premere-

P R U S S I A

mur. Quid postea? petiisti Germaniam. Scilicet ut hanc quoque intestino bello graui & acerbo, multis ab annis ardentem, seque crudeliter armis concutientem, magnus pacis arbiter, ad pacem reuocares? reuentem pax (si Dijs placet) armis, sumere fœdera cogeres? quid esset denique iuste pugnare, quid esset moderatè imperare, quid esset subditos sanctè in fide tenere, doceres? Ergo sanctiss. Imperator, in deserto illo peregrinoque solo iaces! Iaces! Miseret me tanti bellatoris, tanti victoris, tanti maximorum consiliorum moderatoris. Sed tamen diu stertas oportet, in his terris, quia citò te, magne Gygas in cœlos erigere voluisti, ut cum ipsis Superis immortale bellum gereres. Citò ab his in illas terras, citò ab illis tandem in alias transuolasti. Orbem terrarum, tuis illis immanibus armis subiugare, magnus scilicet S V E T I C V S A L E X A N D E R in animo habuisti: magnificas gratulationes, à tuis illis disertissimis Oratoribus audiisti, vota fœlicissima, omina auspiciatissima, antequam tanta, tamque illustria confecisses bella, admisti; ante ingentes victorias, tempestiuè triumphare properasti; ne quisquam de tua vanitate, præter ipsum te ageret triumphum. An non erat tibi gloriosius in pace viuere, aliena non appetere, quam te, tuaque omnia bona, vitam, famam, uxorem, amicos, exercitum, ad dedecus sempiternum prostituere? Nimirum te infirmitatis esse tuæ memorem oportebat, & ab ipsis brutis animalibus discere cautiorem solertiam. Testudinem (Liuius in Oratione P. Quinctij ait) ubi collecta in suum tegimen est, tutam ad omnes

R E C V P E R A T A.

omnes ictus videmus esse, vbi exerit partes aliquas, quodcunque nudauit, obnoxium atq; infirmum habere. Nihil temeritate periculosiùs est Aud. nihil æquitate, & animi moderatione laudabiliùs in Principe.

Cyneas ille Tessalus, vir admirabili memoriâ, & eloquentia singulari, vt Dëmofthenis æmulum & imitorem lepidum & facetum, liquido possis agnoscere; cùm Pyrrhum Regem nimis incitatum in bellum Italicum cerne-
ret, iucundè admodum eum rogauit. Victis Romanis quid agemus: vincemus (inquit Pyrrhus) Siciliam: & rursus eâ victâ, quid? à Lybia & Carthagine (Pyrrhus ait) quis abstineat? Deinceps (ait Cyneas) his victis, eritne finis militiæ nostræ? Hic (Rex ait) nequaquam: Sed Macedoniam, Græciam, & reliquas mundi partes, hac potentiâ facilè superabimus. Tum Cyneas suauissima blandissimâque voce, sed subactis omnibus in vniuersum, ô R E X quid acturi sumus? Pyrrhus ridens, ocium agemus, ait, & dulcissimis sermonibus, conuiuijs, atq; lætitiâ perfruemur. Adest nobis Pyrrhe aceruus ingens (ait Cyneas) eorum omnium, ad quæ, per cædem, & sanguinem nos ducis: fruamur ergo præsentibus: mittamus odia, auertamus dissensiones, bella respuamus, pessimamq; omnem rapinarum latrociniorumque occasionem tollamus, & genio, si libet, indulgeamus. Sed furdo fabula; non persuasit peruiacissimo Regi, lepidissimus Orator, neque illum à cogitatis latrocinijs abduxit. Eadem enim proteruia Pyrrhus Aud. qua Gustauus laborabat, par illius erat amen-

P R V S S I A

tia, similis animi audacia, & in rapiendis regnis alienis libido; eundem deniq; vterque vitæ, temeritatîsq; suæ finem accepit. Immemor vterq; suæ fuit sortis, immemor Fortunæ superioris, maiorumq; suorum. Nam Pyrrhi Patruus erat ille Alexander, qui cū nimis auidè Italiæ regnum appetiisset, in Brutijs interemptus est. Pater quoque eius Æacides Epyri Rex, impotentis itidem & præfracti animi, cū aduersus Macedonas, importunissimis bellis fatigaret populum, regno pulsus est; secūmq; exilij comitem, hunc bimulum Filium Pirrhū traxit. qui post Parentis obitum, annum vndecimum agens, ab Epirotis, odio in misericordiam conuerso, reuocatus est in regnum. Hic ergo cū adoleuisset, iisdem maiorum exemplis ac vestigijs institerat, eadem temeritate præceps ferebatur; præsertim cum illi Fortuna benigniùs indulgeret; credo, vt is grauiùs è summo culmine caderet. Prospero enim rerum successu elatus, Tarentinis, Lucanis, Samnitibus contra Romanos in auxilium venit: Inde Valerium Leuinum Consulem, tetro insuetoque elephantorum odore, ac terrore superauit: iterumque Romanum exercitum grauitè fudit. Quibus victorijs tumidus & inflatus, Regnum Siciliae facilè obtinuit, Carthagenenses ab ea insula eiecit, Helenum filium eius insulae Regem fecit: Alexandro Italiae regnum, quasi iam possedisset destinauit: reuersusq; iterum in Epirum, Antigonom Regem fugauit, Macedonia occupauit. Quid plura? Non contentus, tantis victorijs, tantis triumphis, Græciæ Asiæq; regna, per vim rapere in animo constituit.

Sed

R E E C V P E R A T A.

Sed dum Spartanos, alijs bellis iutentos, primo aggredere-
 tur, mulieris (ô ignominiam !) virtute repulsus, filium
 Ptolomæum, & magnam exercitus partem amisit : inde Si-
 ciliæ regno spoliatus, naufragio turpique fugâ pressus,
 cum tandem Argos concessisset, & Antigonum in vrbe ob-
 fessum expugnare conatus esset, saxo è muro, à quadam
 muliercula ictus, miserrimè periit : atq; sic vtriusque Fortu-
 næ ridenda non imitanda ludibria, cautiore posteritati reli-
 quit. O miseram dominandi sitim, & lubricam morta-
 lium Fortunam, inanesq; contentiones omnes, quæ ante
 tempestate insperata franguntur, & corruunt, quàm por-
 tum attingere potuerunt.

Intellexit ergo prudentissimus REX noster VLADI-
 SLAVS, gloriosius esse sibi, & ad omnem posteritatis me-
 moriam laudabilius, eas regiones recuperare prudentiâ, &
 æquitate, quas Gustauus fraude, scelere, latrocinij pos-
 sedisset, contaminassetque. Pugnat ille perfidia, & te-
 meritate : resistendum illi erat clementia, & pietate : ille
 vaferrimis incursionibus, præocupauit Prussiam ; noster
 VLADISLAVS iustissimus, non nisi maturis consul-
 tationibus, eandem debuit recuperare. Vt quo magis ho-
 mines, pellacibus vulpeculis, ratione & consilio præstant :
 eo sint illæ virtutes illustriores ad gloriam, & perpetuam
 posteritatis Famam, quæ humanum bonum, non bellui-
 num, dolum commendant. Triste mortalibus spectaculum
 Aud. exhibebat PRUSSIA. Pulsâ fuit Religio, iura ne-
 glecta, infidæ euntibus viæ, flumina nauigantibus impe-
 dita,

P R U S S I A

dita; domus, vicique, passim rapinis, incendijs, immanitate afflicti: sola denique castra, in squalentibus campis fulgentia, spectabantur. Nec populus primo furore sentiebat grauiora se pati, sub hospitum Tyrannorum grege, quam quæ iustus Dominus imperasset. Proditor ipse sui populus, & proditoris merces. Quis florem illius oræ reuocasset? quis præsidio satis firmo, nobis horreum illud vberimum circumsepsisset? si futuræ Pacis, & Ocij iucundissima possessio, tranquillitasque abfuiisset? REX ergo fortissimus, & Iustitia subditos coercuit, & hostes auctoritate terruit, & exteras vicinasque gentes, sapientiæ famâ conciliauit. Vt & debellare superbos armis, se posse, cùm esset opus docuerit, & arma sua cùm vellet sapienti consilio temperare. Vt sciret Orbis vniuersus, Poloniam gentem moribus candidam, robore firmam, Orthodoxa Religione conspicuam, Ecclesiæ populorumque Christianorum propugnatricem, regnorum Catholicorum gemmam, veræ libertatis asyllum, bellicosæ nobilitatis officinam, augustam fortissimorum Ciuium Patriam: à REGE VLADISLAO, summo nobilitatis Principe, vero Libertatis Patrono, magno Religionis Catholicæ vindice, fortissimè Orthodoxæ Ecclesiæ defensore, sapientissimo Iustitiæ moderatore, Patre Patriæ clementissimè defendi. Equidem bono quodam semper omine, propitijque fatis, VLADISLAORVM nomina, nostræ illuxerunt Sarmatiæ: hoc verò præsentī iustissimo fortissimoque, VLADISLAO, nihil ad magnarum virtutum commendationem illustrius, nihil ad

R E C V P E R A T A.

hil ad spem, clarissimorum egregiorumq; facinorum certius, nihil ad famam gloriamq; Polonæ gentis firmius, & accomodatius, diuina dare nobis potuit benignitas. Nam Poloni veteres, maiores nostri, Regiæ magnitudinis formam, quam animo comprehensam habebant, huius vocis potissimum notione, complexi sunt: quâ & Reges suos optimos, solerti quadam excitati præfagitione dotarunt, & ornarunt. Vt non Antonios, ab hominis vnus imitatione; non Augustos, ab aliqua maiestatis contemplatione: non Ptolomeos, ab vna officij regij mentione; per summam adulationem: sed à valida Fama, illustriq; gloria, & virtute numeris omnibus absoluta, secundum intimam veritatem, VLADISLAOS nominarent. Quàm fortis, quàm sapiens, quàm clemens bellator, victor, triumphator, fuerit is VLADISLAVS, qui parens extitit, & excitator, huius nostri Athænei nobilissimi; scimus omnes. Ille Crucigeros, magnis frequentibusque bellis exercitatisimos, tumidos & insolentes victorijs, natura & ingenio ferocissimos, omni vecordia & dritate immanissimos, fregit, vicit, depressit: ille hanc ipsam Prussiam, de qua nobis est sermo, ab illis ipsis iniquis, & ingratissimis possessoribus, iustissimis armis vindicauit: ille tandem supplices prostratosque hostes, certis pacis conditionibus adstrinxit, & quietos modestosq; viuere iussit: ille denique rebus egregiè gestis, vicinorum populorum inuidiam superauit. Simultates cum Imperatore nobis inimicissimo sustulit, intestinas rixas, odia grauissima, con-

P R U S S I A

tentiones acerrimas, saluberrimis consilijs mitigauit, & ex-
 tinxit. Quid alter ille magnus Bellator VLADISLA VS,
 huius Filius, Poloniarum & Hungariæ Rex, quæ bella gef-
 sit, quas victorias, quos triumphos sibi peperit? An verò
 quēquam, qui vel leuiter vetustatis annales attigerit, latere
 potest? aduentu VLADISLAI Iagellonidis in Hunga-
 riam, maximas Amurathis copias, omnibus rebus ornatas,
 atq; instructas esse deletas? Urbem clarissimam Hunga-
 risque hæreditariam, & charissimam Bielogradum, obsesā
 ab Amurathe, maxima multitudine, & oppugnatam ve-
 hementissimè, Regis fortissimi virtute, fælicitate, consi-
 lio, summis obsidionis periculis liberatam? ab eodem Re-
 ge, exercitum ingentem, qui Duce Carambeio, in Hunga-
 riam studio inflammato raperetur, superatum esse, atque
 depressum? Magnas hostium præterea copias, multis præ-
 lijs esse deletas? patefactamq; Hungaricis legionibus esse
 Bulgariam; quæ ante ex omni aditu, nostris populis clausa
 esset? Sardicam, cæteraq; non ignobilia oppida, in quibus
 erant præsidia Turcæ, omnibus rebus ad vim paratis refer-
 ta, aliasque vrbes Thraciæ, vno aditu, atq; aduentu Regis
 esse captas? Messitem Bassam bellicosissimum, cum filio, à
 Ioanne Hunniade, Regis huius auspicijs, esse interfectum?
 Sciabadinum alterum Bassam, trepidè, turpiterque fugere
 coactum? Ab eodem Hunniade decem millibus mili-
 tum, triginta millia Turcarum cæsa, ac profligata, qua-
 tuor millia in deditionem accepta? altissimos & difficilli-
 mos montes, in sinu Thraciæ, Macædoniæq; superatos? ip-

sum

R E C V P E R A T A.

sum Amurathem spoliatum magnis possessionibus, & propugnaculis, in intimas sui imperij latebras, se se immerfisse? & ad alias gētes, nationesq; remotiores, trepidum confugisse? Hæc omnia fælicissimè à VLADISLAO Iagellone esse gesta, Hungariam metu liberatam, ciues recreatos, vitæ, fortunis, & libertati restitutos, quis ignorat? Quid? nonne constat, ita Regem VLADISLAV M, de fortunis Ciuium, de salute populorum, de Christiani nominis integritate dimicasse, vt nullius in delicti suspensionem, tanti triumphatoris victoriæ vocarentur. Non vi, nisi contra vim, vsus est; non fraude, sed virtute; non dolo malo, sed fortitudine; non rapinis, sed animi magnitudine; non insidijs, sed aperto Marte; cum Amurathe sceleratissimo hoste toties decertauit: & tantam sibi gloriam, tantam famam, admirationemq; apud omnes gentes peperit, vt dignus esset, qui omnium populorum Christianorum suffragijs, & sanctissimi Pontificis voluntate, contra Turcam, Dux vnus maximus, eligeretur. Cùm ferocissimus Amurathes, nihil nisi scelus, fraudes, immanitatem, moliretur, eiacularetur; vicos incendijs, oppida direptionibus, agros depopulationibus, vrbes trepitatione, miseros homines seruitute, & squallore opprimeret. Fregit igitur Spartacum, diritate ferocem, immanitate intolerabilem, VLADISLAVS: neq; recusauit, quo minus vel in extremo spiritu, si quam opem Reipub. Christianæ ferre posset, sceleratam barbari impresionem experiretur. Et quanquam tantorum laborum præmia, non sunt in hac vita, finem fructumque suum

P R U S S I A

consecuta; sed tamen ad immortalitatem translata sunt, ubi illi fortissimi Christianarum gentium propugnatores, gloriæq; diuinæ veri propagatores, atq; vindices, a uo perfuuntur sempiterno. Sed quid ego, in his immoror, quæ per se ipsa manifesta sunt, & illustria? illud miremur potius, tantam esse nominis huius maiestatem, ut omnium virtutum heroicarum, retineat, hæreditario quodam iure, possessionem. Quam pusillus erat LOCTICVS ille! & tamen quæ bella gessit? quas victorias de hostibus decerpfit? quos triumphos sibi parauit, quis cogitando non obstupescat? ut non immerito apud ingeniosissimum nostrum Poëtam ambitiosissimè gloriatur.

*Corpore parvus eram, cubito vix altior vno,
Sed tamen in paruo corpore, magnus eram.*

*Non ego Prussorumq; Bœmorumq; cruorem,
Iactabo cladem, nec Gedomire tuam;*

*Fortunam vici! cum qua mihi bella fuerunt,
Ut Niger è terris triste volaret iter.*

*Ter cecidi regno, per te Rhamnusia semper,
Post lapsum erexi maius ad arma caput.*

*Corde viris opus est magno, non corpore: magnum
Qui strauit Goliath, nonne pusillus erat?*

*Ingentem paruus Polipheum vicit Vlisses,
Sed tamen ille hominem, tam graue Numen ego.*

Equidem nolo esse hoc loco Syllabarum auceps, & cantor Etymologiarum, sed tamen eorum hominum, incredibilem licet admirari sapientiam, qui omnes regij muneris partes

R E C V P E R A T A.

ris partes, tam aptè, tam appositè, tam prudenter, in nostra lingua, paucis Syllabis effinxerunt. Nam quoties famâ potentem, illustrem gloriâ, præstantem fortitudine, validum robore animi, & corporis, nominare volebant, toties, & vno quidem breuiq; nomine, vocabant VLADISLAVM. Vt qui hoc nomen grande, & illustre ferret, cogitaret, sciretq; se esse Regem: sentiretq; se frustra VLADISLAVM appellari nomine, nisi Regem officio, pietate, prudentiâ, fortitudine, iustitia, animi magnitudine, clementiâ, repræsentaret. Neque alias in Rege virtutes, quàm quæ augusto hoc nomine continentur, Deus ipse desiderat. Satis viuit gloriæ, satis famæ, satis immortalitati, quisquis colit Iustitiam, servat æquitatem, moderatur fortitudinem, fouet pietatem, amplectitur prudentiam, admittit in animum clementiam; atque is vno nomine vocatur, & est ipse VLADISLAVS. Itaque respexit nostram Patriam, multis procellis, & bellorum tempestatibus iactatam, supremus ille gubernatòr, & arbiter imperiorum Deus: cùm hunc nobis, hisce afflictissimis temporibus, præfecisset Regem, qui vnus cæteris omnibus, virtute, prudentia, æquitate, clementia, animi magnanimitate, & pietate, antecelleret. Vt quemadmodum diuina illa mens, per hanc mundi aspectabilis fusa naturam; sic ille ipse propagator, in partes omnes, prouidentia, potentiaq; lumine, Sarmaticum orbem, bonis & necessarijs legibus, temperaret. Illius autem thronum esse iussit, arcem bonorum, improbitatis scopulum, propugnaculum Innocentiæ, in-

P R V S S I A

opiæ perfugium, iustitiæ asyllum, benè beatèque viuendi normam, pietatis officinam, communis Pacis, atq; ocij, certissimum firmissimumque fundamentum. Huic inter homines Deo, beatam Ciuum vitam proposuit; vt ea opib; firma, copijs locuples, gloria diues, virtute honesta sit. Viueret ipse aliorum commodis, oblitus sui; admitteret in animum, integram inuiolatamq; Reipub. curam, tamque se pro subditis, quam supra subditos esse, cognosceret.

Verè, & meritò, tot rebus fortiter gestis, Te nobis probasti VLADISLAVM, Sereniss: Rex VLADISLAE. Senferunt Te, non solum pertinaces hostes, validum dextrâ, Marte potentem, & armis: sed nos quoq; maximâ nostra cum voluptate, & consolatione, sensimus hoc tempore, quo in omnes partes bellis distrahebamur, consilijs Tuis prope diuinis, stabilitam, & confirmatam Pacem: recepimus vicinarum gentium amicitiam, quam Tu ita conciliasti, ita confirmasti, ac corroborasti, vt Te nobis luculentissimè probaueris VLADISLAVM. Hærent, durantque vestris in animis Aud. illustria Sereniss: Regis facinora, victoriæ, triumphî: quæ in omni posteritatis memoria vigeant, manebuntque. Frangendus erat immanis robore, proteruus temeritate, insolens diritate, exultans audaciâ Moschus, fregit hunc, illiusque impetitiones omnes, subitò & insperato aduentu suo, depressit, & contudit, fortissimus ac fælissimus VLADISLAVS. Arcendus erat à finibus perfidus Abazi Bassa, auertendus à patrijs focis, & laribus, altero post anno, trux ipse Spartacus, arcuit illum auspicijs

R E C V P E R A T A.

spicijs & fælicitate VLADISLAI, Dux Exercituum vigilantissimus Stanislaus KONIECPOLSCIVS: hunc verò præfens ipse auertit, summoque cum dedecore fugauit, & repressit; atque adeò Pacis condiciones imperiosas, accipere còegit, potentissimus fortissimusque REX VLADISLAVS. firmanda tandem erat pax, & componenda in PRUSSIA, composuit hanc & firmavit, clementissimus VLADISLAVS: atq; ita firmavit, vt melioribus conditionibus, firmari nequaquam potuerit. Omnia quæcunq; erant ablata nobis, restituta sunt: arces, propugnacula, vefugalia, Ciuitates, optimo iure, in nostram cesserunt potestatem. Quid plura? sine omni prælio, sine tumultu, sine trepitatione, sine effusione sanguinis, vicimus! vt gloriosius sit, & ad perpetuâ posteritatis memoriam illustrius, Sereniss: Regi VLADISLAO propemodum inermi, armatam exaruisse Prussiam, subque suam reuocasse potestatem, quàm si vi, si robore machinarum, si impulsu tormentorum, eandem fractam, prostratam, omnibus bonis exhaustam, præfidijs, & munitionibus orbatam, miserabiliter in suis ruderibus iacentem, flentem, gementem, fame, siti que languentem, ac pene morientem, in suâ tandem gratiam recepisset; ex qua nec fructum decerpere posset vllum, nec hostibus reliquisset.

Itaque non enumero cohortes, non examino fortissimorum nostrorum militum robur, non deprædico illustrium Principum animosam heroicamque fortitudinem, non bellicum apparatus, Oratione ostentatrice diuendo,

& exag-

P R V S S I A.

& exaggero: non enim mei hoc est ingenij, ac ne officij quidem, de tantis tamque magnificis rebus, præsertimque à meo conspectu, & professione auersis, & remotis, disceptare, vel iudicare. Agat per me licet, cui placet, disceptatorem Phormionem, ego sum, & esse volo, taciturni Pythagoræ modestus alumnus, & imitator Harpocratis. Fuissent sanè nostri Poloni paratiores, atque magis obarmati, aduersus omnem vim, & hostium audaciam, duxissent fæliciter, fortiterque, longum diuturnumq; bellum, commeatu, tormentis bellicis, & omnibus affatim rebus instructi: præsisissent fame, siti, obsidione, in propugnaculis Ciuitatum Suecos: hi quoque fuissent patientes animis, & corporibus, contra nimbos, inedia, frigora, tempestates, Urbium ruinas, mea in nihil interest: illud vnum constantissimè dico & affirmo, diuino quodam consilio factū esse, quòd prius rem tantam, certis conditionibus pacis, quàm velitationibus præliorum incertis, experiri voluerint. Nam fuissent illi victi, nos victores: at non sine nostro magno grauiq; damno. Reliquiæ enim tanti belli, multos forsàn in annos durassent. Sed præterea, vt funditus reliquiæ fundi possent: at non expediebat, pulcherrimas vrbes, fortissima propugnacula, nobiliss: Ciuitates, speciosissimos vicos, sana, templaque sanctissima, funditus prosterni, & euerti, suisque viduari ornamentis. Quo enim oculo aspexisset Christianus *P R V S S I A M*, Sarmatiæ ocellum, vectigalium officinam, Poloni orbis delitium, turpiter inter sua cadauera iacentem ?

Quod

R E C V P E R A T A.

Quod cùm viderent Optimatum nequaquam satis pauci, vicinarumq; gentium Oratores grauissimi, quos arbitros consiliorum, Sereniss: REX habuerat, iusto dolore commoti, & excitati, diutius studia sua non prefferant. Fœderibus opus esse, clamabant: Validam populi partem, utilitatis spe consensisse Suecis, innocuam plebem studijs contrarijs rapi, & discindi aiebant: hos denique an seruare præstaret incolumes, an incensos desperatione, in mutuam excire cladem, dubitabant. Iam & ipsi Sueci, qui à Gustauo commissam tenuerant Prussiam, ad meliorem reuocati mentem, pacem tandem poscebant, pacem supplices petebant, orabant.

Merito quidem apud Te, (attendite Audit. sic deprecatores, Oratoresq; Sueci S. R. M. sunt allocuti) merito accusamur, & damnamur repetundarum, apud Te Inuietissime REX, sed ecce agnoscimus erratum, deprecamur culpam, magnanimumq; istum Tuum, & heroicum animum obtestamur, velis ignoscere supplicibus. Non totum nostrum delictum est, magna pars illius, ad Dominum spectat; sed quem ulciscaris, non habes; vita functus est. Tenuimus Prussiam, tanquam mox migraturi: hospites omnino, non patres familias fuimus, forsitan etiam profuimus huic prouinciæ: quia prouidâ manu, colligere vectigalia, ab officiosis nauicatoribus, tuos istos pigros collectores docuimus. Repete igitur optimo iure à nobis, tanquam iniquis possessoribus, Tuam Prussiam: sed oramus, ita repete, vt benè meritis militibus, quanquam olim contra Te stetissent in acie, breue ad tempus relinquas Liuoniam. Libe-

P R V S S I A

ralitatem istam, vel in hoste agnosce iustam, & exemplo ipse Tuo comproba. Fruantur hisce bonis sanguine suo partis, boni milites, Tuum forsan etiam in obsequium parati. Recipies, & quidem cum fanore, nobis crede, recipies, vicinas etiam ditiores, atq; Regna, quæ Te iure hæreditario concernunt. Non pridem ignouisti Moschis, suscepisti fædus, cum Othomano, dedisti leges pacis barbaris; Nos qui propemodum Tui sumus, pacem non impetrabimus apud Te benignissimum, clementissimumq; inter orbis Principes Dominum? Noli à Tua natura discedere: perfice hanc in nobis, quam in aliis probasti, diuinæ Clementiæ imitationem: ut felix, ut pius, ut gloriosus, in orbe Sarmatico, longissimos in annos regnes. Non semper Fortuna fauet bellatoribus, nonnunquam se se subtrahit ab ipsis victoribus. Scis hac ipsa in PRVSSIA, & ob hæc ipsam PRVSSIAM, dum supplex posceret, à VLADISLAO IAGELLONE pacem Plauenius Crucifer, eaq; consilio quorundam ferocientium, & recenti victoria insolescentium, non concederetur, quàm minus prosperè res cessissent Polonis? Qui nimis elicit sanguinem Medicus, enecat potius prægnantibus, quàm corrigit fætum. Nunquam peccat vlla gens, quæ Pacis condiciones, vel iniquas accipit, sine effusione sanguinis, non modò iustas. Meliorem esse certam pacem, quàm optatam victoriam aiunt Sapientes. Hæc, & plura, submisit admodum Sueci orabant.

Quis non commoueretur precibus, & lachrymis propemodum iusta petentium, quis non condoluisset, si mæstos, sordidatos, reos, de capite, de fortunis, de fama, periclitantes aspexisset? Victus & ipse lachrymis, qui alias armis
vinci

R E C V P E R A T A.

vinci non potuit, clementissimus R E X, supplicibus ignovit, afflictos erexit, perditos recreavit: P R V S S I A M inuiolatam armis, bono iure recepit, Liunioniam deniq; fortibus militibus ad tempus concessit.

At hîc exclamat hircosus Centurio, optimam vberri-
mamq; regionem, tot in annos, perduellibus concedi? At
ego vicinos esse, atq; adeò amicos aio, quos nobis fœdera
sanctissima, quos pax desideratissima, tenacissimè constrin-
xit, ac consociauit. Non amittitur, quod conceditur, ad
tempus. Neq; illi adeò ingrati, omniq; humanitate erunt
destituti, qui se non sentiant, clementissimi, liberalissimiq;
Regis gratiâ, tantorum esse participes bonorum. Reddent
igitur, & quidem cum fœnore reddent, non Liunioniam so-
lùm, sed etiam se, suosq; animos, & ipsam deniq; Sueciam
in tutelam fauentissimi Regis, tanto tamq; pio beneficio
obstricti. Valeant igitur, illæ importunæ voculæ, his con-
ditionibus, diminui gloriam nominis Poloni, nihil in rem,
nihil in memoriâ, tanto tamq; magnifico apparatu belli-
co, esse confectum, ac comparatum. Satis enim compara-
tum est gloriæ, cùm antiqua illa labes ignominie, sit extin-
cta: satis nomini Polono restitutum est laudis, cùm P R V S-
S I A sit restituta: quæ multo sanguine, à maioribus olim no-
stris, fuit redempta: satis denique magnifico confectum est
apparatu, cùm nunquam hunc postea, in simili reparare
negotio erit necesse. Quid expectatis amplius Audit. vi-
cimus hostes, consilio; non armis, amicitia; non prælio; pie-
tate, non temeritate; clementia, non pertinacia; vicimus.

P R U S S I A

Non tractauimus opus periculosaē alex, non cruento praelio certauimus, & tamē pariter de hostibus, ac de nobismet ipsis, quod magis est mirabile, triumphamus.

Nolite enim feroces esse admodum mei Poloni, deponite ab animis generosis, istam rigidam vltionem; humanitas vobis cum literis, & sapientia instillata est. An semper vnum tantummodo Martem spirabitis? Consilio magnæ res geruntur, non armis. Erant prudentes, erant fideles, erant eloquentes, qui tantarum rerum momenta, diligentissimè contemplabantur Senatores. Ergo quibusdam te-nebrionibus assentiemini, qui bellicosi sunt inter pocula, fortes inter scyphos, inter crateres ingentes, eloquentes? at horum alij nunquam omnino castra viderunt, nunquam in acie hostes aspexerunt, nunquam ne extremo quidem aditu, Martem salutarunt: alij verò, Deum bonum, quàm sunt audaces in pagis, quàm pugnaces in oppidis, quàm in rusticulorum tugurijs excutiendis, generosi. Ignoscite fortissimi milites, qui pietatem, qui diligentiam, qui fidem vestram eximiam, hac expeditione, erga Patriam, satis gloriose probastis; non enim vos vllum meum iniuriosius percellit verbum: sed illos vrgeo, illis irascor vehementer, quos glocitatio gallinarum, balatus ouium, boatus vaccarum, à castris ad rapinas, ab acie ad prædas, ab exercitu ad miserrimorum hominum iniquissimas lacerationes, abduxit, & auocauit. Non enim tramite recto in castra properarunt, sed per vicos remotissimos, villas disiunctissimas, oppida egentissima, rapinisq; exhausta (quod de impijs Diuinus vates profert) in circuitu ambularunt.

Qua-

R E C V P E R A T A.

Quam multis passibus isti distant, non solum à maiorum, nostrorum, sancta illa seueraq; disciplina, quâ imperium hoc florētissimum reddiderunt: sed etiam ab ipsa, Ethnicorum militia, quæ tanta fuit, vt etiam fidem legentium excedat, quis non videt? Illam temperantiam militum, illam priscam seueritatem, illas rigidas leges, in libris hodie tantum, non in hominibus cernimus: qui luxum, rapinas, lacerationes agrestium, omnem he luandi licentiam, in nostris militibus dessemus. Crateres ingentes, summa cum alacritate exhauriunt; hostes in acie, cum pauore obstupescunt. Tum illis in mentē, & memoriam, illa redit trepidatio, quam ob vêtustum merum, & opressionem pauperū, contraxerunt: quo fit vt non forti dextera, sed fugacibus poplitibus Martem exerceant. O sanctam illam legem militarem, quam in Aureliano notauit Vopiscus. *Nemo pullum alienum rapiat, ouem nemo contingat, quam nullus auferat, segetem nullus deterat, oleum, sal, lignum, nemo exigat: annona suâ contentus sit.* At nunc non nemo istorum fortissimorum militum, ieiunum militiae nomen iactat, qui perdidit virtutem. Sacramento se militiae obstrinxit, vt excutiat colonos, non hostes. Et quod maximè execrandum est, non ante militiam solum, in ipso progressu, istas colligit præbitiones, sed etiam dimisso exercitu, nullo confecto prælio, caudatas cohortes, per pagos, & oppida circumducit: vt gloriosius inter egentissimos agricolas, triumphet. Itaque magnifici bibones, labores suos, inter imbellem plebeculam exaggerant, enumerant sumptus, augent merita, ad admirationem; vt rapinis iniquissimis, illas suas redimant expeditiones. Ignoscite dolori meo Audit. si paululum deflexi, si in miserrimorum hominum commemorandis iniurijs hæsi. Neq; enim iustior dolor vllius esse potest, quam hic meus, susceptus ex hominum egentissimorum damnis: neq; iracundia magis vlla laudanda, quam ea, quæ hominum afflictissimorum, qui se ipsi ab iniurijs vindicare non possunt, innocentiam defendit.

Quare vt eo vnde profluxit, redeat oratio mea, mittite hunc interea dolorem Aud. & potiùs deprecate mecum, tantam S. R. M.

P R U S S I A

felicitatem, laudate iustitiam, admiramini æquitatem, prudentiam, fortitudinem, animi magnitudinem, clementiam, summis laudibus celebrate: eam verò pacem, quæ sapientissimis cõsilijs stabilita est, ad omnem posteritatis gloriam, & admirationem propagate, Quid enim est tam populare, quàm pax? (ait Suadæ medulla Tullius) qua non modò ij, quibus natura sensum dedit, sed etiam tectæ, atque agri, mihi lætari videntur? Quid tam populare, quàm libertas, quam non solùm ab hominibus, verùm etiam à bestiis expecti, atque omnibus rebus anteponi videtis? Quid tam populare, quàm otium, quod ita iucundum est, ut & vos, & maiores vestri, & fortissimus quisq; vir, maximos labores suscipiendos putet, ut aliquando, in otio possit esse, præsertim in imperio, ac dignitate: qui idcirco etiam maioribus nostris, præcipuam laudem, gratiamq; debemus, quod eorũ labore sit factum, ut omnino in otio esse possemus. Quare quĩ possumus huic non fauere Paci? cùm videamus, tanta bona, ab ea tanquam ex fonte promanare. Libertatem propriam, generis, ac nominis nostri gloriam, otium domesticum, vectigalia integra, deniq; omnia, quæ nobis chara atq; ampla sunt, in fidem, ac possessionem nostrorum populorum esse recepta, ac recuperata

Quid de nostris hisce studijs dicam? nonne reflorescent, præsentissimo Sereniss. sapientissimiq; Regis aduentu, & aspectu, ad omnem lætitiã, & alacritatem? Nonne se mutuo nobilissima ingenia, ad honestam æmulationẽ, doctis magnisq; laboribus, concitabunt? Si enim hæ ipsæ imagines, quas nostro nobis in conspectu collocamus, incredibiliter

R E C V P E R A T A.


nos recreant, & exhilarant, sola commemoratione virtutū
maximarum S.R.M. quid fiet, cum præsentem intuebimur?
quo tum studio accendemur? quā lætitiā efferemur? qua
commouebimur exultatione? quibus vocibus, & acclama-
tionibus, vitam longissimam, omnemq; prosperitatem, no-
stro vindici, nostro liberatori, nostro assertori optimo, fa-
lentissimoq; comprecabimur? Hic Patriæ patrem fælicis-
simum, salutabit Sereniss. VLADISLAVM, ille libertatis
Academicæ propugnatorem sapientiss. alius publicæ pacis
authorem vigilantiss. alius insuper Orthodoxæ Religionis
custodem, ac reparatorem fidelissimum laudabit, depredi-
cabit: nec quisquam in illius laudibus, ac virtutibus com-
memorandis, conticescet.

*Ergo tibi DE O nostro, tantæ Pacis, auctori & reparatori,
o, sancto, immortalis, gratias agimus immortales, teq; ora-
mus, & obsecramus, ut tanti boni sis ipse conservator. Inspira
dissentientibus animis, si adhuc dissentiunt (tu enim corda
scrutaris hominum) si discrepant, si forsitan aliqua moliuntur
mala, si struunt insidias, sanctam & inuiolatam Concordiam:
dissidentes à vera Religione, tuæ pietatis illustra lumine. Sit
una fides, una veraq; Catholica colatur ubique, ac promouea-
tur Religio: sicut tu es vnus, æternus, immortalisq; DEVS.
Regnet o celestis Pater, in regnis imperiisq; Christianorum
populorum tranquillitas, vigeat pax, floreat sine omni exulce-
ratione, in bonis Ciuibus animorum consociatio. Dignæ sunt
animæ, o Christe Saluator, quas tu pretiosissimo tuo redemisti
sanguine, dignæ sunt inquam tua miseratione atque clementia.
Reuoca bone Pastor, ad vnum ouile, errantes oues; illumina cæ-
cutientes*

PRUSSIA RECVPERATA.

cutientes animas, illo lumine, quo illuminas omnem hominem
venientem in hunc mundum. Ponant temeritatem, mittant
odia, iurgia, lites, rixas, dissensiones respuant, & abijciant
suis denique teterrimis erroribus, ipsi tua gratia, resipiscant.
Agnoscant Romanum Pontificem, tuum in terris Vicarium, ca-
put fidelium, pietatis summum arbitrum, militantis Ecclesie
Ducem maximum. Faue mortalibus, benignissimo tuo afflatu,
sanctissime Spiritus, qui cum Patre, & Filio, vnus es, & æter-
nus, & æqualis Deus, ab vtroq; pariter procedens. Inspira co-
lumbinum candorem mentibus, felle antiqui serpentis imbutis
dissipa tristes tenebras ab animis, & illis redde gratissimam
lucem sanctitatis. Vt sentiant Iudæi, intelligant Schismatici
fateantur Hæretici, percipiant Turcæ, cognoscant barbari, no-
stram sine dissensionibus concordia: nostramq; veram, sanctam
& Orthodoxam Religionem, esse viam certissimam salutis, in
hac vitæ anchoram spei, in periculis: officinā charitatis, in bo-
nis operibus: Symbolū fidei, in tentatione, & aduersariorum in-
sultibus: ut tandem Orbis vniuersus, summo consensu, summaq;
pietate copulatus, te vnum Deum Patrem, & Filium, & Spi-
ritum S. & hic in terris religiosè adoret, piè colat, sancto
veneretur, ac reuereatur; & in cælis laudabilem laudet, & glo-
riosum benedicat in sæcula. Cui nos, pro maximis beneficiis, quæ
in singula momenta percipimus, proq; tantis VLADISLAO
regnante bonis perceptis, gratiam, benedictionem, gloriam,
damus, & concinnimus sempiternam.

D I X I.



34. IV. 457



